

20 AUG 2002  
TNT-MIRZAN/I  
MIRZAN MAHATHIR DILANTIK HAKIM ABLA

KUALA LUMPUR, 20 Ogos (Bernama) -- Pengasas dan presiden Institut Strategi dan Kepimpinan Asia (Asli) Mirzan Mahathir menjadi rakyat Malaysia pertama dilantik sebagai hakim acara tahunan Anugerah Pemimpin Perniagaan Asia (ABLA).

ABLA adalah anugerah serantau Asia yang pertama diwujudkan bertujuan memberi pengiktirafan kepada pencapaian pemimpin-pemimpin perniagaan yang berpangkalan di Asia.

"Anugerah yang bermula tahun lalu ini diilhamkan, dikembangkan dan dianjurkan bersama oleh CNBC dan TNT," kata pengurus besar TNT Malaysia, LC Lee, pada Malam CEO TNT anjuran TNT Malaysia bagi meraikan pelantikan Mirzan.

Katanya, setiap tahun, pemenang-pemenang ABLA ditentukan oleh sebuah panel yang terdiri daripada sepuluh orang hakim dan diketuai oleh Prof Dr Schutte, dekan bersekutu bagi pendidikan eksekutif di Asia dari INSEAD, sebuah sekolah perniagaan dunia yang terkenal.

Beliau berkata, anggota-anggota panel yang lain dipilih daripada wakil-wakil sidang pengarang majalah perniagaan Dow Jones, Economist dan Academea serta tokoh-tokoh terkemuka dalam dunia perniagaan Asia.

Anugerah tersebut terbahagi kepada empat kategori - Tokoh Pemimpin Perniagaan Asia (anugerah utama), Tokoh Inovasi, Tokoh Warga Korporat dan Pilihan CEO (pemenangnya ditentukan melalui undi yang dijalankan di kalangan CEO terkemuka di Asia).

Mirzan juga adalah pengerusi eksekutif Konsortium Logistik Bhd dan Sabit Sdn Bhd serta pengarah Dataprep Holdings Bhd. -- BERNAMA

FA KY JR